



Matadalan ba aplikante ba Pacific Engagement Visa (PEV):

Oinsá buka no aplika ba vaga serbisu online

Matadalan ida-ne'e sei ajuda aplikante ba PEV buka serbisu iha Austrália, aplika ba papél sira, no ko'alia ba empregadór sira.

Estratéjia atu buka serbisu

Estratéjia ka planu di'ak atu buka serbisu sei ajuda ita atu organiza an, motiva an, no sei aumenta possibilidade ba ita atu hetan serbisu ne'ebé di'ak. Aplikante sira presiza:

Haree importánsia ba ita-nia knaar atu buka serbisu hanesan ho importánsia hala'o serbisu ruma

Dala ruma, buka serbisu mak knaar ne'ebé susar. Sai badinas, nafatin positivu, hatudu pasiénsia no keta rende an

Tuir rotina (toman) loroloron nian

Halo planu atu uza oras balu kada semana atu buka serbisu

Halo planu réal sira

Porezemplu, karik ita-nia planu mak aplika ba vaga serbisu hamutuk 3-5 kada loron, ka gasta oras 3-4 kada loron ka kada semana atu buka serbisu

Halo lista ba vaga serbisu ne'ebé ita aplika ona

Hakerek lista ba vaga serbisu hotu ne'ebé ita aplika ba. Inklui, naran ba kompañia, papél serbisu nian, no link ba sítiu internét ba vaga serbisu ida-idak. Ida-ne'e sei ajuda ita atu nafatin organiza an.

Kontakta ema ne'ebé jere knaar hatama ema ba serbisu

Hodi kontakta ema ne'ebé jere knaar hatama ema ba serbisu, ita bele kria relasaun di'ak ho sira. Importante atu:

Buka-hatene (halo peskiza) kona-ba organizasaun ruma

Buka ba empregadór nia informasaun kontaktu sira liuhusi kompañia nia sítiu internét. Informasaun kontaktu rekrutadór nian dala barak inklui iha anúnsiu vaga serbisu nia rohan

Kontakta direktamente

Aprezenta an ba empregadór. Ita bele husu kona-ba data serbisu ne'e sei komesa, prosesu atu aplika ba serbisu ne'e, ka fó-hatene katak ita hakarak aplika ba vaga serbisu ne'e tanba ita mós aplika dadaun ba Permanent Resident Visa (PR) (Vistu Residente Permanente), tanba PEV mak vistu permanente oin ida. Ema haree toman hanesan ne'e hanesan hahalok profisionál no bele ajuda ita hari'i relasaun di'ak ho empregadór

Buka tuir ita-nia aplikasaun

Baibain, iha Austrália aplikante ba vaga serbisu ida mak kontakta empregadór depois sira hatama sira-nia aplikasaun ba papél ida. Ita bele manda mensajen ne'ebé badak no respeito ka telefona atu husu kona-ba ita-nia aplikasaun nia progresu.

Oinsá atu buka-hetan empregadór nia informasaun kontaktu nian

- Dala barak iha anúnsiu ba vaga serbisu, ita bele buka ba rekrutadór, ka ema ne'ebé jere knaar hatama ema ba serbisu, nia naran ka informasaun kontaktu nian.
- Se anúnsia vaga serbisu nian inklui de'it kompañia nia naran, karik ita bele buka-hetan informasaun liután iha:
 - Kompañia nia sítu internét – buka ba pájina hanaran 'Careers' (Kareira) ka 'About Us' (Kona-ba ami) tanba dala ruma pájina hirak-ne'e inklui informasaun kona-ba ekipa rekrutamentu ka rekursu umanu. Karik iha pájina hanaran 'Contact' (Kontaktu) ita bele hetan kompañia nia número telefone ida ka enderesu email ida, no ita bele uza ida-ne'e atu husu ema ne'ebé jere knaar hatama ema ba serbisu nia informasaun kontaktu nian
 - Sítu LinkedIn – buka kompañia nia pájina no buka informasaun kona-ba empregadu sira. Buka informasaun kona-ba manejer ba rekursu umanu, rekrutamentu, ka ema ne'ebé jere knaar hatama ema ba serbisu.

Se ita buka la hetan informasaun kontaktu nian ba empregadór ruma, keta laran-tun. Ita bele nafatin aplika ba knaar ruma hodi hasee sira iha karta apresentasaun ho liafuan profisionál hanesan "Dear Hiring Manager" ka "To the Recruitment Team." Importante mós atu inklui organizasaun nia naran iha parágrafu primeiru hodibele hakerek karta úniku no profisionál.

Informasaun jerál kona-ba kuadru dijital ba vaga serbisu nian iha Austrália

Iha Austrália iha kuadru dijital ba vaga serbisu sira (job boards) ne'ebé ita bele konfia ba. Ita bele uza kuadru dijital sira-ne'e hodi aplika ba vaga serbisu sira. Tuirmai ne'e mak sítu internét sira-ne'ebé ema barak mak uza.

Sujestaun sira kona-ba uza kuadru dijital ba vaga serbisu nian

Uza kuadru dijital ba vaga serbisu nian mak lalais liu, nune'e buka oportunidade atu uza kuadru hirak-ne'e. Sujestaun sira-ne'e sei ajuda ita buka ba vaga serbisu no aumenta possibilidade ba ita atu hetan serbisu ne'ebé di'ak ba ita.

- Prenxe perfil online tomak hodi empregadór sira bele buka-hetan ita
- Uza job alerts ba tipu serbisu ne'ebé han malu ho ita-nia abilidade no lokasaun (área ba ita-nia hela-fatin)
- Uza keywords – liafuan sira-ne'ebé loloos liga ba ita-nia abilidade sira no serbisu ne'ebé ita buka ba

- Keta uza kuadru dijital ba vaga serbisu nian ida de'it. Empregadór oioin uza kuadru dijital ba vaga serbisu oioin
- Haree fali kuadru dijital ba vaga serbisu sira beiibeik, tanba vaga serbisu foun mosu kada loron
- Se ita buka serbisu espesialista ruma, haree kuadru dijital ba vaga serbisu ba serbisu espesialista ne'e.

SEEK ([seek.com.au](https://www.seek.com.au))

- Ida-ne'e mak Austrália nia sítu internét vaga serbisu nian ne'ebé boot liu, ne'ebé iha vaga serbisu rihun ba rihun.
- Ita bele hatama (upload) ita-nia resume, kria notifikasaun automatika kona-ba vaga serbisu ruma (job alerts), no haree informasaun kona-ba saláriu sira no ema seluk nia komentáriu kona-ba kompañia ruma (company reviews).

Indeed Australia ([indeed.com.au](https://www.indeed.com.au))

- Plataforma vaga serbisu globál ida ho vaga serbisu barak iha Austrália.
- Plataforma ne'e buka-hetan informasaun husi kompañia sira-nia sítu internét no kuadru vaga serbisu sira seluk.
- Iha filters sira-ne'ebé simples ba funsaun 'Buka'.

Australian JobSearch ([jobsearch.gov.au](https://www.jobsearch.gov.au))

- Governu nia sítu internét ofisiál ba vaga serbisu sira.
- Gratuítu.
- Inklui serbisu nivel-inísiu sira no serbisu ho orientasaun (apprenticeships).

LinkedIn ([linkedin.com](https://www.linkedin.com))

- Sítu ho rede profisionál globál ida no kuadru vaga serbisu nian ne'ebé boot.
- Empregadór no rekrutadór sira mak publika vaga serbisu sira.
- Ita bele kria perfil gratuítu ida hodi hatudu sai ita-nia abilidade no esperiênsia, no liga ho empregadór sira.



Kontakta PEV nia Servisus Apoiu ba Empregu

PEV nia Servisus Apoiu ba Empregu bele:

- Apoiu ita bainhira buka ba serbisu
- Ajuda ita atu ko'alia ho fiar-an bainhira dada lia ho empregadór sira
- Verifika katak serbisu ne'ebé ema/kompañia ruma oferta ita mak kumpre rekeztu sira ba ita-nia vistu (visa)
- Ko'alia diretamente ba empregadór sira kona-ba ita-nia data komesa nian no kontratu
- Fornese rekursu sira ne'ebé ajuda ita prepara atu serbisu iha Austrália.



Ita bele hetan informasaun liután kona-ba PEV nia Servisus Apoiu ba Empregu iha pev.gov.au

Iha ami-nia sítiu internét ita bele buka-hetan rekursu seluk tan, inklui follu faktu sira no matadalan atu kria rezume (resume templates). Ita mós bele tau naran ba Sesaun Informasaun kona-ba Empregu sira hodi aprende buat seluk tan kona-ba buka-hetan serbisu iha Austrália.

